

HEZKUNTZA. Haur Hezkuntzako lehen zikloa ematen ari diren zentroak «irmo» zain ditzala aldarrikatu dute

Alberto Barandiaran | IRUÑEA

Irakaskuntza sindikatuak, guraso elkarteak, haur eskoletako langileak eta Nafarroako Unibertsitate Publikoko (NUP) Psikologia eta Pedagogia Sailak Nafarroako Gobernuari eskatu diote gara dezala 0-3 urte bitarteko zikloa, eta lan hori Hezkuntza Departamentuak har dezala, eta ez, orain arte bezala, Ongizate Departamentuak.

Atzo aurkeztu zen idazkiaren sinatzaileek diote eremu horretan dabilen langileek eta taldeek aspaldian gainditu dituztela zaintza eta kustodia kontzeptuak, eta horren ordez «irizpide pedagogiko eta hezitzaile egokiagoak dituen eskola eredu» garatu dutela.

«Hezkuntza jaiotzen den unean hasten da», adierazi zuen, sinatzaileen izenean, Miren Oñate Arrosadiako Haur Eskolako zuzendariak. «Haur Hezkuntza, beraz, ez da Gizarte Ongizate Departamentuari dagokion gaia, Nafarroako Gobernuak Hezkuntza Departamentuari dagokiona baizik».

0-3 urte bitarteko zikloa gara dezala eskatu diote UPNko Gobernuari

Ongizate Departamentuaren esku utzi izana salatu dute sindikatu, aditu eta langileek

Egun, Gobernua prestatzen ari da ziklo hau arautuko lukeen dekretua, baina, manifestuaren sinatzaileen ustetan, Kalitate Legearen zain dago. Lege horrek, LOGSEk ez bezala, zaintza eta kustodia kontzeptuak nabarmetzen ditu hezkuntzako en aurretik.

Sarea esku pribatueta uzten ari dela salatu dute

0-3 urteko Nafarroako haurren hezkuntza eskubidearen aldeko

agiria Iruñerriko haur eskoletako langileek sinatu dute, NUPeko Giza eta Gizarte Zientzia Fakultateko Dekanotza eta Psikologia eta Pedagogia Sailak, Herrikoa eta Sortzen-Ikasbatuaz guraso elkarteak, eta ELA, LAB, UGT, CCOO eta EILAS sindikatuek.

Idazkiak dio Nafarroako Gobernua ez dela sortzen ari haur eskola sare nahikorik, eta hori esku pribatueta edo udalen esku uzten ari dela.

Beraz, Hezkuntza Departamentuari eskatzen diote «irmo» zain ditzala Haur Hezkuntzako lehen zikloko zentro guztiak, eta beharrezkoak diren baimen administratiboak lortzeko garaian LOGSEk ezartzen dituen baldintza eta betebeharrak «guzti-guztiak» bete behar direla gogorarazten dute.

Halaber, sinatzaileek nahikoa plaza eskaintzeko eskatu diote Gobernuari toki erakundeekin eginiko hitzarmenen bidez, eta euskarazko eta gaztelaniazko eskaerak atzitzeko ere eskatzen dute, baita ager litezkeen hezkuntza behar bereziak ere.

Orobat, Europako Batzordeko Haurtzarora atzitzeko sareak ezartzen dituen irizpideak jarrai ditzala eskatzen dute. Irizpide horiek gela bakoitzean izan beharreko ratioa, profesionalen prestakuntza, langileen lan baldintzak... Hori guztia arautzen dute.

Pablo Sotes NUPeko irakasleak Gobernua «irizpide ekonomikoak» hobesten ari dela nabarmendu eta zikloaren izaera hezitzailea azpimarratu zuen.

Euskal Unibertsitate Barrutiaren batzarra atzeratu egin dute

Erredakzioa | DONOSTIA

«Barruti planteamenduak eskaintzen dituen aukera guztiak aprobetxatzeko» bertan behera geratu da euskal unibertsitateetako hautetsiek bihar egin behar zuten I. Bilkura Nazionala.

«Larunbata data gisa jarri genuen proiektua indartzeko asmoz, egun hauetan, ordea, konturatu gara ez zuela edukiko berez izan behar zuen indarra», azaldu dio EGUNKARIARI Barrutiko kide Jon Telleriak.

Beraz, hainbat eragilek proposatutako aukerak direla medio, eztabaidatzeko denbora gehiago eta elkarlana bultzatzeko besteak beste, azaroaren hasiera edo erdialderako batzarra atzeratzea erabaki dute, «bai parte hartze aldetik eta baita eraginkortasun aldetik arrakasta handiagoa izango duelako ere».

Unibertsitatean proiektua zabaltzeko

Unibertsitatean proiektuarekiko jarrera zehazten joan nahi dute. «Bada-kigu unibertsitate mundua konplexua dela eta mantso mugitzen dela, sektore eta eragile asko daude, eta jarrera oso onak jaso ditugun arren ez ditugu baldintzatu nahi», adierazi zuen Telleriak. «Ez dugu nahi guk jarritako data bat azterketa sakon horretan muga izaterik», gaineratu zuen.

Gogoetek ondorio positiboak ekarriko dituztela diote Barrutiko kideek, horregatik, eragile bakoitzak eztabaidatzeko behar duen denbora izatea nahi dute, «beharrezkoa den proiektua da hau eta eragileek ondo aztertzea nahi dugu, ez soilik izena ematea, masa kritikoa lortu nahi dugu».

Euskal Herriko Unibertsitate Barrutiaren Aldeko Mugimenduak hainbat eragileren babesa jaso du, bai unibertsitate mailako elkarteena eta baita unibertsitate kanpokoena ere. Besteak beste, UEU, EIRE eta euskal adararren atxikimendua jaso du.



INAKI BERGARA

Haur Hezkuntzaren aurreko zikloa garatzeko eskatu diote Gobernuari. Irudian, haur hezkuntzako umeak, Jaso ikastolan.

Mahaiak Eusko Jaurlaritzaren «bermerik» jaso ez izana kritikatu zuen atzoko bileran

Luis Karlos Garcia | GASTEIZ

Arabako, Bizkaiko eta Gipuzkoako Haur Hezkuntzaren Aldeko Mahaiak ohartarazi du Eusko Jaurlaritzako Hezkuntza Sailak «bermerik» ez diola eskaini, eta ez diola ziurtatu nahi izan datozen asteetan gorpuztu beharreko 0-3 zikloari buruzko agindu jakinen edukia negoziatu ahal izango ote duen.

«Aginduak onartu aurretik Mahaiarekin hitz egingo dutela ziurtatu digute, eta kito. Tama-lez, ez daukagu batere bermerik», salatu zion hedabide honi plataformako eledun batek atzo arratsaldean, Lakuan, Hezkuntza Saileko arduradunekin bildu ondoren.

Administrazioak sei agindu egin behar ditu hemendik udara bitartean, zikloaren mamia

benetan arautuko dutenak. Honoko hauek dira: Partzergo Publikoei buruzkoa, Ikasle-en Hartzeaz, Kuotei buruzkoa, Zentroen Subentzioaz (Titularitate Publiko eta Pribatukoak), Familientzako Diru laguntzez eta Herri Inguruneetako Hezkuntza-Asistentzia Zerbitzuen Subentzioei buruzkoa.

Mahaiak espero du aginduon edukietan konpontzea

Anjeles Iztueta sailburuak joan zen astean aurkeztutako dekretu nagusiari leporatutako «gabezia larriak». Hala, sare publikoaren aldeko ekimena aldarrikatu du, dekretuak sare pribatuaren alde «nabarmen» egin zuelakoan.

Gauzak hala egonda, Mahaiak eutsi egin dio aste hasieran plazaratutako balorazioari, eta Jaurlaritzak alorreko eragile guztien «adostasuna» duenik ezin esan daitekeela gailendu du. «Benetako negoziazio prozesurik eza» kritikatu du.